

DOMENIE XV «VIE PAL AN»

Jutoris pe Liturgjie

Domenie, ai 15 di Lui dal 2018

O vin sintût tal vanzeli di domenie stade che Gjesù nol à vude une buine esperience tal so paîs li che la int si scandalizavin di lui e nol podè fâ nissun miracul. Chest, ancje se i à metude une spine in cûr, no lu à blocât tai siei progjets; in fat, lui al leve pai borcs dulintor e al insegnave (Mc 6, 1-6). E no dome, par vie che il vanzeli di vuê nus vise: Gjesù, clamâts dongje di se i Dodis, al scomençà a mandâju doi par doi.

O podaressin dî che Gjesù al viodeve clâr prime di dut dentri di se e di consequence ancje devant e torator di se; in plui la fiducie te peraule di Diu lu sustignive. Par chest, ancje se al jere di patî, ogni dificolât e vignive, te preiere, cjapade in considerzion e superade.

Su chest stamp al à vivût ancje il profete Amos (sec. VIII p.d.C.) de prime leture. Lui al veve olmât dentri di se i ordins di Diu e lis consequencis dal so predicjâ. Al à acetât e al è lât indevant.

Scoltant lis leturis di vuê, nol è che nô o vin di fâ ce che a àn fat il Signôr, o Amos o i apuestui; al è di domandâsi ce che o vin di fâ come cristians te nestre situazion personâl, di famee, di comunitât di paîs, di glesie e di popul. Cuale ise la mê clamade personâl, la mê piçule o grande mission cristiane. Comprendût chest, o larìn indevant ancje nô cun fiducie come che a àn fat Amos, il Signôr e i apuestui.

O stin vivint lis zornadis dai sants Ermacure e Furtunât, de dedicazion de glesie di Aquilee e dai sants martirs aquileiês; in plui la diocesi e sta passant moments dal dut particolârs. Cjapìn chestis leziions come un moment di riflessione dongje de nestre glesie par cirî di capî miôr cuale che e jê sore di nô la volontât dal Signôr. Intanto o disin:

Antifone di jentrade

Sal 16,15

Jo te justizie o vuei podê cjalâ la tô muse,
cuant che mi dismôf, o vuei saciâmi dome cul cjalâti.

Colete

Diu, che tu ur mostris ai straviâts la lûs de tô veretât
par ch'a puedin tornâ in strade,
daur a ducj chei che si professin cristians
di rifudâ dut ce ch'al contraste cun chest non
e di tignî ce ch'al è convenient.
Pal nestri Signôr Gjesù Crist to Fi, ch'al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE

Am 7,12-15

Va, profetize al gno popul.

Amos, cjapant sù pomis di sicomôrs e vuardeant mandriis di nemâi, al veve vût dut il timp di scoltâ ce che al succedeve di porcariis e di miserie tal ream di Israel. Al cjapà in cussience lis sôs decisions, al scoltà la vôs di Diu e al predicjà fin a sedi butât fûr dal templi di Betel, santuari dal re.

Dal libri dal profete Amos

In chei dîs, il predi di Betel Amasie i disè a Amos: «Vatint, profete! Va vie di chi, scjampe te tiere di Gjude; lajù tu mangjarâs il pan e tu profetarâs. Ma a Betel no tu profetarâs plui, parcè che chest al è il santuari dal re e il templi dal ream». Amos i rispuindè a Amasie:

«No soi ni profete ni fi di profete;
o soi un boâr e un ch'al va a sbusâ i sicomôrs.
Il Signôr mi à brincât
ch'o levi daûr de mandrie e mi à dit il Signôr:
Va, profetize al gno popul Israel».
Peraule di Diu.

SALM RESPONSORIÂL

dal Salm 84

Il cristian, te cunfusion dal mont di vuê, al pense ancje lui, come Amos, Gjesù e i apuestui: O vuei scoltâ ce ch'al dîs Diu; te situazion dificile che o stin passant e je fate ancje par nô la invocazion:

R. Mostrinus, Diu, la muse dal to boncôr.

Se cjantât: Il cjant dai salms responsoriâi, p. 152.

O vuei scoltâ ce ch'al dîs Diu;
il Signôr sigûr di pâs al fevele
pal so popul e pai siei fedêi.
Sigûr che la salvece e je dongje
par chei che lu rispjetin;
la sô glorie e tornarà di cjase te nestre tiere. **R.**

Bontât e fedeltât si son strenzudis,
justizie e pâs si son bussadis.
La fedeltât e menarà sù de tiere
e e cucarà jù dal cîl la justizie. **R.**

Di fat il Signôr nus darà ogni ben di sorte
e e butarà il so prodot la nestre tiere.
La justizie e cjamine denant di lui,
e su l'olme dai siei pas la dretece. **R.**

SECONDE LETURE

Ef 1,3-14

Nus à sielzûts in lui prin de creazion dal mont.

O scoltìn cumò un toc sflandorôs di un dissepul di Pauli, toc che forzit no rivin a digjerî par vie dal nestri stomi debulut. Noaltris o sin plui usâts a lei boletins e devozions e al vâl par nô ce che S. Pauli al scrîf a chei di Corint: Jo, fradis, no ài podût fevelâus come a oms spirituâi ma come a int di cjar, come a frutins di tete in Crist. Us ài dât di bevi lat, no une mangjative sute parcè che no jeris ancjemò in grât. E no sês nancje cumò, parcè che o sês ancjemò di cjar (1 Cor 3, 1-3).

Ma intant scoltìn cun calme chest toc (forme lungje o curte) e tignìn dentri di nô ce che plui nus semee mangjative adate a la nestre vite spirituâl.

De letare di san Pauli apuestul ai Efesins

Benedet Diu e Pari dal Signôr nestri Gjesù Crist,
che tai cfi nus à colmâts
di ogni sorte di benedizion spirituâl in Crist.
Nus à sielzûts in lui prin de creazion dal mont,
par ch'o fossin sants e cence magle denant di lui tal amôr.
Lui nus à predistinâts a jessi siei fîs di anime,

midiant di Gjesù Crist,
seont il disen plen di boncûr de sô volontât,
a laude dal sflandôr de sô gracie
che nus à gratificâts tal so Fi plui cjâr.
In lui, midiant dal so sanc, o vin la redenzie,
il perdon dai pecjâts
seont la ricjece de sô gracie
che si è spandude cence misure sore di nô
cun ogni sorte di sapience e di inteligjence.
Lui nus à palesât il misteri de sô volontât
seont il so disen di bontât ch'al veve destinât in lui,
par metilu in vore te colme dai timps:
di tirâ dongje in Crist dutis lis robis,
chês dal cîl e chês de tiere.
In lui po o sin stâts sielzûts,
pal fat che o jerin stâts predistinâts seont il plan di chel
che dut al opere conforme la sô volontât,
par ch'o fossin a laude de sô glorie,
nô che par prins o vin sperât in Crist.
In lui ancje vualtris,
dopo di vê scoltade la peraule de veretât,
il vanzeli de vuestre salvece,
e di vê ancje crodût, o sês stâts marcâts cul Spirtu Sant,
ch'al jere stât imprometût
e ch'al è la capare de nestre ereditât,
pal riscat di ce che lui al à cuistât,
a laude de sô glorie.
Peraule di Diu.

Forme curte:

Ef 1,3-10

De letare di san Pauli apuestul ai Efesins

Benedet Diu e Pari dal Signôr nestri Gjesù Crist,
che tai cîi nus à colmâts
di ogni sorte di benedizion spirituâl in Crist.
Nus à sielzûts in lui prin de creazion dal mont,
par ch'o fossin sants e cence magle denant di lui tal amôr.
Lui nus à predistinâts a jessi siei fis di anime,
midiant di Gjesù Crist,
seont il disen plen di boncûr de sô volontât,
a laude dal sflandôr de sô gracie
che nus à gratificâts tal so Fi plui cjâr.
In lui, midiant dal so sanc, o vin la redenzie,
il perdon dai pecjâts
seont la ricjece de sô gracie
che si è spandude cence misure sore di nô
cun ogni sorte di sapience e di inteligjence.
Lui nus à palesât il misteri de sô volontât
seont il so disen di bontât ch'al veve destinât in lui,
par metilu in vore te colme dai timps:
di tirâ dongje in Crist dutis lis robis,

chês dal cîl e chês de tiere.
Peraule di Diu.

CJANT AL VANZELI

1Ts 2,13

R. Aleluia, aleluia.

Acetait la perauale di Diu no come perauale di oms,
ma come ch'e je in veretât: perauale di Diu.

R. Aleluia.

VANZELI

Mc 6,7-13

Al scomençà a mandâju.

Gjesù al à lis ideis claris su ce che al à di fâ: al decît di dâ responsabilitât ai siei compagns di viaç; ur met lis condizions: ur ordenà che... ur spieghe dai pericui e dai riscjos di faliment no vessin di scoltâus... ur segne a cui che a àn di lâ: int straviade e malâts. No jere une mission facile, ma lui no ur à platât nuie. I Dodis a scoltarin lis sôs raccomandazions. Il Signôr, se lu scoltin, al è cussì ancje cun nô: nus pant ce che te vite e te comunitât o vin di fâ.

Dal vanzeli seont Marc

In chê volte, Gjesù, clamâts dongje di se i Dodis, al scomençà a mandâju doi par doi, dantjur il podê sore dai spirts soçs. Ur ordenà che, fûr di un sôl baston, no cjolessin daûrsi nuie pal viaç: ni pan, ni sac, ni bêçs te cinturie; ch'a vessin i sandui ma no cun dôs toniis. Ur diseve: «Pardut là ch'o jentrais tune cjase, restait li fintremai che no tornais a partî di chel lûc. Ma se intun puest no vessin di acetâus e no vessin di scoltâus, lait vie di li e scjassait ancje il pulvin ch'o vês sot dai vuestris pîts a testimoneance cuintri di lôr». E lôr a partirin, predicjant che si veve di convertîsi; a paravin fûr un grum di demonis, a onzevin cul vueli une vore di malâts e ju vuarivin.
Peraule dal Signôr.

Su lis ufiertis

Cjale, Signôr, i regâi de tô Glesie in preiere
e daur la gracie a di chei che ju ricevin
di cressi inte santitât e inte fede.
Par Crist nestri Signôr.

Antifone a la comunion

Sal 83,4-5

Ancje la passare e cjate une cjase
e il so nît la cisile dulà poiâ i siei piçui,
dongje dai tiei altârs,
Signôr des schiriis, gno Re e gno Diu!
Furtunâts chei ch'a vivin inte tô cjase:
a puedin cjantâ lis tôs laudis cence polse.

O ben:

Zn 6,56

Chel ch'al mangje la mê cjar e al bêf il gno sanc,
al reste in me e jo in lui, al dîs il Signôr.

Daspò de comunion

Daspò di vê ricevût il to regâl, ti prein, Signôr,
che, celebrant dispès i tiei misteris,
e cressi in nô ancje la vore de tô salvece.
Par Crist nestri Signôr.

* * *

Riflession di pre Antoni Beline: **Al scomence a mandâju a doi a doi**

Tun altri toc dal vanzeli, in Luche, si lei che Crist al à sielzût setantedoi dissepui e ju à mandâts a doi a doi a predicjâ la buine gnove. Culi al dîs che al mande i i dodis. Nissune diference e nuie di straordenari. Al scugnive mandâ ancje i apuestui e probabilmentri al à mandât par prins chei che ju veve sielzûts par prins e che a vevin di sedi lis colonis de glesie...

Vanzeli par un popul, an B, p. 133.

Cjants

Libri Hosanna, sot dal titul Eucaristie: messe, benedizion eucaristiche, rîts e cjants; dal n.7 al n.62 comprendût.

* * *

*I predicjadôrs no rivin a convertî la int
parcè che a àn masse erudizion.
A varessin di vê invezit une flamele
dal grant fûc che al è l'amôr di Diu.
I predicjadôrs si butin masse sul erudît;
par chel la lôr flamele e scjalde pôc.*

S. Taresie di Avile

* * *

**USGNOT - DOMENIE 15 - AS SÎS SORE SERE,
TE BASILICHE MARI DI AQUILEE,
MESSE DI AVÔT DAL FRIÛL
AI SANTS ERMACURE E FURTUNÂT.**

*Su, fati dongje, int di S. Ermacure
Lo spirito del mondo non ci vuole popolo,
ci vuole massa, senza pensiero, senza libertà.*

Pape Francesc 29.11.2013

* * *

- * *I cjants, salms e cjantadis a vegnin ripuartâts cu la numerazion dal libri: Hosanna, Cjants e preieris dal popul furlan, Ed. Glesie Furlane, 2012.*
- * *Il cjant dai salms resposoriâi, Ed. Glesie Furlane, 2012.*
- * *50 corâi de cristianitât todescje voltâts par furlan, ed. Glesie Furlane, 2016.*
- * *Il libri des riflessions sul Vanzeli al è: pre Antoni Beline, Vanzeli par un popul, an B, Ed. La Nuova Base.*
- * *Par domandâ chescj libris scrivêt a info@glesiefurlane.org*